

四庫全書

集部

欽定四庫全書

集部

梁園寓稿卷一至五

詳校官編修<sub>臣</sub>翟槐

中書<sub>臣</sub>劉源溥覆勘

總校官庶吉士<sub>臣</sub>何思鈞

校對官中書<sub>臣</sub>賈鏞

謄錄監生<sub>臣</sub>范從理

欽定四庫全書

集部六

梁園寓稿

別集類五  
明

提要

臣等謹案梁園寓稿九卷明王翰撰翰字時舉禹州人元季隱居中條山中明初出為周王橐長史王素驕有異志正諫弗納斷指佯狂去王敗竟無所坐事載明史周王傳後起為翰林編修謫廣州教授夷獠亂城陷死難

明史藝文志載所著有敝帚集五卷梁園寓稿九卷敝帚集今未見此書卷數與明史合焦竑經籍志止稱寓稿二卷誤也焦志別載翰山林樵唱一卷今亦未見殆併佚歟翰始抗驕王終殉國事其立身具有本末而當時不以文章名故古體往往有質直語然自抒性情無元人穠纖之習七言近體聲調亦頗高朗

國朝朱彝尊輯明詩綜未錄翰詩當由未覩斯  
集今以其人而存之見

聖代表章忠烈闡揚幽隱之義焉乾隆四十三年  
五月恭校上

總纂官臣紀昀臣陸錫熊臣孫士毅

總校官臣陸費墀

金定山月全書

提要

--	--	--	--	--	--	--	--	--

欽定四庫全書

梁園寓稿卷一

明 王翰 撰

五古

古詩五首

空堂霜氣肅落木集已多  
牆陰數叢菊歲晏承陽和  
寘卷下堂行自愛顏色佳  
掇英汎濁醪為我駐年華  
淵明已黃土幽姿徒爾嘉  
惆悵南山上千載空烟霞

清風汎欄楯明月耿房帷夜永草蟲弔天長鴻鴈悲容  
華漸銷鑠陽景空中馳寶劍光陸離白馬黃金鞵丈夫  
貴循名詎以別離為含情掩瑤琴涕泗空漣洏

日暮洛陽道北山正嶮嶢高墳望累累歲久青松凋為  
閒葬者誰云是漢唐朝龜龍卧深草文字半沉銷淒風  
撲霜葉陰雲慘寒郊頽垣隱狐兔荒棘鳴鷓鴣千載雍  
門琴令人涕淚交

夷齊千載後西山淡無姿賢人千載生空林老蕨薇青



青廟前栢高高堂下碑空山閱今古同與天地推個儻  
魯連子抱義不逢時片言為解紛尺素殺軍師恥秦誓  
蹈海辭趙非金為顏波無回流砥柱高崔嵬芳名在簡  
策壯士飲風儀

今日天氣佳曳杖出衡門涼露濕芒屨清風感悅巾幽  
鳥避人飛游魚畏釣沉蛛絲映空張飢隼號北林惡彼  
機事深安能降我心歸來遣世慮濁酒聊自斟

思山吟 并序

余本山野人自計懶殘與世而無為者也適以  
升斗所縻動值輒軻今放出田里猶衣人衣食  
人食不能擺脫世故而為快也徒自羨歸鳥望  
行雲懷故山之松菊作思山吟以寫其悒悒且

自勗云

南山有松樹托根白雲岑枝葉冒霜雪不易太古心我  
昔來結茅相對歲月深輕花釀春酒寒聲雜清琴野馬  
被羈鞅沐猴強冠簪華靡非其心動踐所不任我罪非

所得脫身事幽尋歸來治田疇損物猶蝨蟬矯首望故  
山白雨翳青林首丘匪可忘治任須及今往從荷蓑徒  
永與世幽沉

牧羊

羔羊不受秣呦呦索晨牧稚子懼出門動與虎狼觸垂  
鞭不敢前常向風雨哭我老輕其生仗策入幽谷原平  
散漫食逕狹相追逐霜餘野草白沙寒山水綠荒磴隨  
漁樵深林雜麋鹿讀書坐磐石携蒲向臯陸為感蒙莊

金匱山房詩集  
卷一  
言歸塗不可暮

黃河曲

行吟散鬱積日暮黃河曲黃河崑崙來萬里經平陸西  
北限秦晉東南走梁宋龍門夜雨深砥柱秋濤橫龜鼉  
時出沒鯨鯢相簸弄艱險自天設萬騎安所用人事多  
乖迂山河有變更孝武宣房歌千載有餘清朱梁白馬  
禍草木動悲鳴聖人總四溟天地還清寧河當一澄徹  
因之作頌聲

示子礪

我家本燕雲皇考昔膺任門戶早單弱田園久廢寔中  
原喪亂頻骨肉不得恃兄弟棄草野松楸作平地今我  
雖偶存貧病苦交至有爾且煖眼嗣續得不墜富貴人  
所願詩書須爾事頭角似稍長難以襍童稚玉琢終待  
磨木揉後成器寸陰必自惜前脩可追跂數數恐傷恩  
斯言爾當誌

秋蟬抱葉而吟葉脫而墮困於羣螿亟遣僕置高

樹且憐而作詩弔之

一氣無停機四時仍代用萬物生兩間潛植與蠢動時  
至靡不榮運往詎所慟蟬生糞壤間潛化自能甞登木  
喜得時鳴響甚恣縱既免螳螂搏幸脫痾瘻中或學秦  
箏鳴或作雅琴弄或緩美人歌或繁小子誦或靜而獨  
鳴或聚而相哄不料甕內鷄遽凝竹上鳳涼颼一朝發  
繁霜藉草重強鳴聲噎塞處危心惚恫所付既靡盬脫  
落難持控高蜚翅剪鍛不飲腹空洞局促塵埃中螳困

况集衆我行庭樹間見之心為痛呼兒置深穩聊盡爾  
餘哢作詩予時哉含悽不成諷

言懷呈董仲綸訓導

南山有佳樹衆鳥寒相依佳樹何團團歲暮心不移高  
枝聊可嬉低枝安我棲有巢不能庇敢望故林飛古劍  
光射斗陸沈還不朽欲淬使之利持此恐傷手不若兩  
錢錐反以得取售向市空抱歸令人顏甚厚虻蚶涎自  
濡蛟龍噓成雲虻蚶以自足蛟龍或可馴大小各逍遙

鷓鴣何足論方崖秋氣高  
天宇何蕭騷主人有西成  
客子免焦勞道途何縱橫  
使我顏色消世故多紛紜  
萬事徒替替一笑欲拂衣  
青山頻見招筵尊幾欲折  
秋風戀綈袍書之雙淚下  
楮觚不能操

題管鮑論交圖

黃金是何物能摧壯士心  
有金交契厚有金交意深  
一朝金用盡相看同路人  
古人重交道敬至義自伸  
我觀管鮑徒交厚情最親  
知心兩無猜異讓常欣欣  
斯可愧



薄俗外物非所珍子魚能一擲幼安同浮塵棄之同一  
道中有偽與真高風魯連子千載名如新

初冬述懷

東風作雪意竹窓寒策策老鴟向晨鳴飢鼠當晝嚇不  
爨米瓶空止飲酒樽側妻子色悽涼吾心自安適前途  
有風雪行路黑如漆貂裘重不煖素顏慘無質吾生抱  
大拙默坐永朝日鶴長與鳧短天性為至佚化工諒均  
平守玄保真白誦詩晤童子或當發蒙密

關山蚤行圖

早起去山店鷄鳴月在天瘦馬戀殘莠僕夫煩力牽山  
外有畏途石粗履幾穿行行二十里彷彿聞炊烟林間  
宿鳥散搖蕩露溥溥遲明據鞍睡夢裏到長安

讀韓信傳

有功當記錄有罪當準理忘功治其罪漢祖少恩耳不  
忍一身誅況及三族死千載胡公言為雪泉下恥

胡氏  
有功

罪相準之說其論  
甚平綱目取之

讀儀秦傳

強秦奮關中六國環恣睢西上望函谷壯士不能踰地  
開天府險灑傲申韓餘治道既出下民性皆異趨彼哉  
蘇張徒挾詐從橫書押闔中時議三寸撓萬夫韓趙弗  
敢違齊楚從其驅車騎頗張皇威焰烜赫如最緩來踵  
迹代行還連茹軻也論王道妾婦明其狙周網既陵替  
秦治非遠圖土地何其貪生民何其辜兵甲日以糜膏  
血日以塗至今載簡冊莊士長不愉斯人在三代讒口

金定四庫全書  
卷一  
伏顯誅

四老

漢祖匿私愛呂氏不寧處大位垂轉易禍福在反覆諫  
口徒期期不勝留侯術四老高蹈士斯出亦頗辱安劉  
實滅劉為趙速剪裁周昌縱強相何濟几上肉激烈鴻  
鵠歌不救身後毒子房多廟筭此舉良不足

初冬述懷時樊女南遷

北風吹大荒晨霜隕羣木天宇淡寥寥河水來汨汨候

鴈常悲鳴蟄蟲已跼伏聿念遠行者衣敝逢歲暮况是  
羈纍人何以營水菽愁來安用生酸痛徹心骨

望雲生

峩峩太行山悠悠行子心憑高望鄉國白雲翳遙岑目  
觸心亦馳親居宛在臨欲發久裴回悒悒傷中襟孝哉  
狄文惠才器真遺珠推轂五龍起扶日升天衢元功照  
簡策存與天地俱許公純孝心羹牆見昏曉辭家曠定  
省作郡理紛擾懷親慕昔賢襟韻同表表惟此遠業期

金匱正屋全書  
卷一  
令譽庶終保

雪晴齋居

停午陰風生向夜  
星彩没入盃湯已  
冰挾續肌欲粟始  
見微霰零俄驚素  
花數皓色射窓楮  
輕聲碎軒竹雅琴  
無秦箏佳茗勝醞  
醪愛此清夜吟共  
剪西窓燭

雪夜茗會

歲月忽云徂  
倏爾值嘉令  
軒裳謝束纏  
蓬茅養清靜  
溪合玄冰積  
階平白雪盛  
時惟朋儕臨  
杖屨造門徑  
開門

延客入拜揖須展敬土爐火新熾石鼎安欲正寒井方  
及深清冷絕泥滓竒茗畜時久待此佳客命蠅聲響不  
歇蟹目亂無定盞葷滌已潔槃托拭更淨咽沃肝肺清  
漱祛齒牙病坐覺昏睡除言出清淡勝幸拜高軒臨媿  
乏珍饌飭鄭重彌明仙聊為盡吟興

孝思堂

雙親久謝世歲月倏已徂音容宛猶在曷以待槃盂晝  
思儼在堂暮思恒倚閭思之不能置淚下霑衣裾陵中

有蓼我堂下有風木草木尚有因獨無父母屬哀哀慈  
母勞戚戚嚴父鞠此心何時已終身詎為足

題靜學齋為陳司訓

昔日武鄉侯教子著明訓嘉言載簡策千古挹芳潤我  
心身上衣皦皦化為緇我身庭中樹時時風撓之內外  
受紛擾聲利何由辭陳均古好學逸情知繕性不惟誦  
書史迹不邁門徑理超性亦澄物遣道自勝跼居有餘  
樂誓不歎貧病朋儕從講問冠屨來相依一朝施樂育



賢哲端可希為國儲賢才文館多光輝青雲終自致白日看翻飛

謁微子祠

朝登微子嶺上有微子祠我來拜堂下升堂瞻聖儀三人儼相向衣冠肖古時嗟此崇黎地何以知祀茲好德本彝性公議孰掩之林木交蔭翳岡巒互參差泉脈且甘冽周道通四馳我欲告邑人好刻銅盤詞

涉路水

早發黎城縣一水橫其前其溪立行人相聚聲喧喧我  
問今何之欲渡無所緣縣官欲安橋漂流隨奔湍邑人  
議舟航沙淺膠其船幾人徒涉之激射若洄連相望無  
百步艱險如登天我觀古聖人舟楫用濟川杠梁有國  
政使民無病褰聖人知有窮而况私智焉退居待水落  
王事匪可延扶掖一濟之河伯誠所憐作詩識吾喜書  
之山石巔

講堂前右植石榴左植脩竹是年蝗灾竹為所食

石榴味苦感而有作

芳樹吐佳花時近君子居君子惜芬香且愛枝葉敷外  
飾內不德細葉含辛毒妖蝗羣飛來四野無嘉穀此木  
免噬嚙為爾受性獨所喜彼偶存所悼惟脩竹抗節異  
羣木畜甘勝諸菽坐見顏色改無復青陰穆向惡尚免  
禍外直恒遭戮轉首霜節至問訊南窓菊

送胡仲雅南歸

秋風拂庭梧有客遠行邁行邁將何之家林稍雲外向

與父母別來敘兄弟愛褰裳上中條秋河方迅快握手  
復幾時良會止一再華筵接高論芳德曳蘭佩歸計何  
匆匆令人增永嘅

郊園秋氣薄征驂方載路送客上中條執手話離素搖  
搖千里心竟以親愛故高亭多秋風假道繁曉露念子  
遠行邁空山日將暮搔首望江南高林起煙霧

中秋明月低足馬獨南歸雨館蟲聲切霜臯樹影稀雲  
開鴻鴈過沙暖鶴鷄飛想到江南日高堂戲綵衣

講堂前種竹舊極盛茂近為蠶蝗所食損見枯落  
斐然君子無所托興復有可類者甚可悼焉

嫋嫋庭下竹移根自當年時霑雨露滋近砌搖芳妍持  
此冰霜操歲寒心特堅蠶蟲自何來遶叢亂飛還致使  
枝葉碎勁節亦虧竊嘉實竟不成鳳飢亦可憐百繞高  
堂下令我心憂煎

梁園寓稿卷一

欽定四庫全書

梁園寓稿卷二

明 王翰 撰

七古

叩馬圖

商家社稷垂年久如何竟落獨夫手妖姬一寵四海毒  
犬馬紛紛鹿臺走周侯神聖天命新渭濱晚起釣璜臣  
旌旗東指盟津野朝歌王氣空沉淪兄弟遼海古墨胎

數言馬首驚風雷君臣義分固如此天意喪殷誰能回  
歸來懷義腹應飽周粟無食可終老首陽山暖蕨薇甘  
想見形容不枯槁黃河水渾難濯纓世賢豈待文王興  
一窮直與天地並景公千駟鴻毛輕披圖一見長太息  
習習清風生几席衣冠儼若見儀刑貪夫而廉懦夫立

過韓廟

紛紛天下逐秦鹿白蛇中斷鬼夜哭將軍晚從隆準公  
仗劍登壇萬人服西來鐵馬疾如風魏豹就虜猶兒童



背水一戰趙壁破飛書纔入燕城崩叱咤素號萬人敵  
龍生敗死猶骨粟帳下悲歌騅不逝霸業無成劔鏃赤  
將軍有功當封齊假王一請君臣疑烏盡弓藏良可惜  
拭淚更讀歸賜碑

七夕篇

七夕家家望河鼓烏鵲翩翩彩鸞舉玉宇無聲河漢流  
風遞吹歌喧萬戶我自少小攻文章天孫為乞雲錦裳  
五色炫爛秋霞光對客落筆聲鏘鏘刻楮三年費心曲

畫蛇豈容添一足人生所貴在真醇以巧術人猶銜玉  
勸君乞巧莫乞深巧深入骨淫人心人心淫慝不可滌  
柳州商監猶昨今我為多技足憂患寧復此夕雜童

閑門却掃省前非遙禮春陵香一瓣

周子有拙賦

### 毛迷古山水

近山青青綰髻螺遠山淡淡浮黛蛾喬松蔭石鐵作柯  
白雲帖水迷礪阿幾家老屋岩石側長林落木秋瑟瑟  
枯槎側倒枕長溪路入陰崖行轉窄樓臺隱隱出木末

山下僧歸背夕日渡頭市散賣魚歸平蕪落日蒼烟堆  
兒子柴門指相似遙望沙觜孤帆開行人走迭山店宿  
髯客跨驢如跨鹿蒼頭苦怨行李重步武跛癢胼生足  
畫工以畫傳其意人生所貴在寡欲蜀山楚水天下險  
君胡為乎苦踽踖此圖題作行路難非寫烟霞樂心曲

樊宗亮墨竹

宗亮風神本瀟灑胸中自有萬竹竿蒼龍雨過影在壁  
彩鳳月冷鳴空山新詩數句細字寫銀鈎挂在青琅玕

毫素醉揮烏帽脫  
鷺綠淺蘸端溪寒  
當時直欲乘興寫  
豈料今日垂涕看

徐士清墨竹

士清世上清狂士  
狂寫墨竹竟得名  
狂發拈筆寫一箇  
鐵網出海珊瑚青  
持鱗候謁四方客  
醉臥木榻呼不醒  
如山白壁不敢換  
時拂素壁千竿成  
士清士清狂且真  
死為狂鬼應有神  
南山松下昔有墳  
墳作平地松為新  
壁間墨竹墨如新  
我詩便作貫管記  
千載更有如斯人

鑄鏡行

妾念嫁時新鑄鏡鑄成團團秋月色從夫從軍藏入匣  
鏡面已昏妾面隔紅顏落為霜葉枯綠髮已隨秋草白  
妾顏雖改心不轉手攜團鏡情脈脈昨日書來在桑乾  
新衣未寄舊衣單秋風入戶吹羅幌妾身未衣念郎寒  
何時降王來欸塞罷負長戈卸征鎧歸來對鏡試春衫  
團鏡重磨妾掃黛

冬日齋居遣懷

十月雪花大如手朔吹奔騰撼北牖閉門伏几讀古書  
招客圍爐飲醇酎世上行路風塵多河冰寒積白我我  
為儒無補謾癡絕坐竊俸廩將如何夙昔早有林泉興  
野鶴山猿自天性一落紅塵竟不歸白雲久塞南山徑  
廟堂之臣夔與龍明堂之材栢與松揖遜堯舜邁往古  
制作禮樂同皇風我本山中釣魚者偶弄文墨自陶寫  
沐猴安可着衣冠夢入雲林亦瀟洒滄浪之水何時清  
水清待我濯長纓束書從此便歸去為續沙頭鷗鷺盟

送劉允中游關中

赤日當天凝不移黃塵吹風雙眼迷劉生觸此入關西  
百趼不倦輕路蹊我問劉生胡為爾載酒問道嚴登躋  
自言我生如醯雞欲挾扶搖運天池又言我生如櫪馬  
擬棄棧豆追馱馱關中形勝天下少壯觀竒聞恣探討  
濁涇清渭光動搖太華終南翠如掃橐泉西去弔三良  
商顏南來尋四皓渭河橋邊楊夫子直節千年照青史  
常平坂下馬太史萬丈文光猶不死金童仙去謾荒涼

石馬陵空自碣磧劉生茲游冠平生  
胷次磊落氣崢嶸  
豪邁不盡遠遊興  
摳衣載質仍傳經  
歸來多載晉唐帖  
璞玉精金等竒絕  
知生好古不好餘  
青李來禽滿筐篋  
我將得此課羣兒  
日向明窓臨一葉  
我亦平生湖海心  
會稽禹穴窮幽深  
孰知病廢坐空室  
門屏咫尺如遙岑  
送君斯遊傷我心  
不覺淚下沾衣襟

狡兔行

中條山下三尺雪  
狡兔不出深藏穴  
連日不食仍苦飢



偷入林間行蹙躡林間山麓無豐養草根木實恣噬齧  
崗頭獵騎如雲來俛耳縮頸心愒愒蹤跡發露一躍出  
健足過眼才一瞥黃犬脫手疾風飛蒼鷹掣臂翻雲抉  
窘迫只作嬰兒啼狼藉平原洒毛血兔肉不甘皮不美  
徒逞騎射供笑啞笑者何樂死何苦更忍搜索倒絕滅  
世上只言兔性狡不見人心更險譎

題賈原善典寶寒潭漁隱圖

君家舊在寒潭住故寫新圖記幽趣木落秋山潭水空

猶把長竿倚溪樹角巾野服身翩翩彷彿當年孟浩然  
王門曳裾今幾年夢魂長繞寒潭邊他年賜告承恩渥  
歸結草屋臨風煙朝朝擊榜向嵒石只許白鷗伴幽寂  
春來舉權入春潭會見桃花汎晴碧

北海鯨時北征納克楚

偃蹇長鯨橫北海怒歎風雷九州拔九州壯士賁育徒  
雄劍長弓幾千隊長鯨掉尾鱗鬣張壯士辟易弓劍傷  
九州塵土山岳動蔽虧日月無晶光長鯨長鯨爾當弭

上帝威靈不可比一朝怒遣似飛來盡赤溟波千丈水  
山岳重安日月明長鯨長鯨爾獨死

擁翠軒

梁園先生夷山曲斲地開軒種脩竹千竿森立隔塵囂  
十里蒼雲淨炎燠彈琴焚香意不俗滿卷佳章詠淇澳  
有時曳杖冠峩峩披拂幽叢逸興多樽壘每置清陰裏  
日待嵇阮來經過高挂幽軒一凭几繞屋娟娟翠如洗  
莫遣家僮掃落花恐損庭前青鳳尾

送毛教授扈從汝寧

稽山海上青連延山陰自古多名賢毛生登第方青年  
風神不減王逸少手中巨筆如脩椽立馬一掃三萬言  
飄然滿紙飛雲煙天官注意求才諳曳裾更入東平府  
東平揀賢如揀珠直向稠人識眉宇辭家躍馬蔡州行  
蔡州舊是懸瓠城汝南先賢有遺迹勞君遠訪披榛荆  
天生才器元無敵日侍賢王親且密朝朝染翰擅詞林  
日日談經趨講席先生有德如陽春半載交情清且真

讀書不獨破萬卷吐論便欲迴千鈞汀草青青汝水綠  
八月扁舟渡洄曲市中倘遇賣藥翁為我跪問長生錄

酒家謠

大梁城中百萬家誰家沽酒為生涯青帘白晝垂到地  
書言美酒非為誇座中多是江南客賣茶販鹽為本業  
自從伴着如花人囊楮番番卷秋葉日長不厭秦箏繁  
夜闌不放清歌歇篋裏黃金索已無朝來暮去情漸疎  
秋風吹斷高唐夢但見陽臺明月孤昨日書來寄親語

老病空床淚如雨寄與佳兒促早歸  
何用離鄉作商賈  
市中賣得舊衣錢獨向黃河買去船

騶虞圖

陽翟之山幾千里山頭千丈神光起  
騶虞瑞世生其間  
百獸爭趨似羣螳漆光玄章耀朝日  
雪色白毛濯秋水  
騶虞含仁性不殘兩虎常從供飲食  
野人奔走告王庭  
整駕取之勞玉趾鸞旗不動仙仗閑  
逡巡俛首伏雕闌  
鼓吹導引入城市填衢塞巷居民看  
咸言聖人堯舜德

基業永固安如山  
玉燭調元風雨時  
草木蕪蕪禽獸繁  
儲祥兆和四靈至  
騶虞稀見從古難  
竭來賜宴承運殿  
羣臣拜賀歡心顏  
鶴駕東行獻金闕  
天門曉啓紅光發  
雕籠昇入龍顏喜  
千官聚看稱竒絕  
聖主謙沖不敢當  
賢王遜美情尤切  
寵章飛動賜金敕  
虎士騰拏分玉節  
歸命丹青寫作圖  
記此竒形前代無  
深林妥尾走妖狐  
枯槎礪吻鳴老鳥  
落木紛紛下空谷  
陰風颭颭吹黃蘆  
一朝金門拜賜歸  
華堂展玩皆懽呼  
什襲珍藏為至寶

金壁雖多孰敢估

具慶堂詩為臨穎教諭張朝宗作

沱江之水清如玉紫霞山高翠堪掬山下華堂畫不如  
鵲鵲蒼烟蔭喬木翁媪相扶近百年遺經教子成世賢  
一朝典教來潁川孝心養親人共憐少者割鮮長行酒  
具慶人間更稀有昔年聞說朱壽昌何似賢名世難朽  
時向賓筵戲綵衣新詩千首總珠璣它年復領天官薦  
除書更捧懼親闈



題上清張真人畫陰厓長嘯圖

穹厓壁立三千尺萬槎蒼官並厓立半空垂瀑似飛龍  
怪石秋陰護苔色水邊鵠立是神仙意欲飛空陵紫烟  
白雲不隔華陽洞綠波遠入桃花源羽衣翩翩無覓處  
萬壑千巖鎖烟霧龍吟鳳噉下青冥天風振落三花樹  
上清宮中仙子家興來繞筆飛烟霞蘇門一嘯聞千古  
但恨不得隨仙槎

梁園寓稿卷二

欽定四庫全書

梁園寓稿卷三

明 王翰 撰

七古長短句

瑤臺篇

中條與太華天際浮脩眉巨靈摩之翠壁斷日月彷彿  
纏東西瑤臺之峯去天才咫尺下視齊州九點煙霧迷  
中有至人骨法竒芙蓉作裳荷製衣玄雲石上紫芝秀

碧沙洞中瑤草肥我時來尋步屨遲杖藜直入白雲栖  
林藏鼎竈自與人間隔雲間或聞犬與雞吾知子兮詎  
學商山采芝之黃綺首陽食蕨之夷齊亦不學遺世節  
分三休宜避地為遠豺狼欺有商碩輔此版築至今草  
木含精輝千年斯人踵芳躅抱養元氣蟠塗泥一日幡  
然作霖雨坐使四海枯槁春淋漓歸來濯足清漣漪浩  
歌明月當崑扉山靈有文慎勿移

仙遊篇

無錢可買季子田無地可置楊公廬中條山下饒斤鹵  
營田一區屋數椽牀頭閒讀種樹書有酒可斟琴可絃  
酒酣耳熱聲嗚嗚對客起舞身翩翩既不能騎鯨鼓浪  
遊汗漫又不能披雲掃霧瞻青天我來此世三十年豪  
氣壓倒江湖前輕舄兩隻鳧扁舟一葉蓮足濯滄海流  
頭枕崑崙巔仙山鼇背青連延三十六宮飛紫煙仙人  
一笑三千年摩頂授我長生詮我欲舉手謝塵世此身  
縈繞終無緣仙兮仙兮辭我清淚之連連盼我美目之

娟娟羣仙知我不可留送我淡月清風邊歸來兩耳聲  
喧喧六合塵土厭腥羶呼兒汲取薔薇露滌手為寫仙  
遊篇

勸君酒

勸君酒歲將暮新歲再來舊歲堂堂去去者挽不回  
來者無由駐春風吹落花花落深可惜不知向君面吹  
落嬌紅色歌緩聲舞垂手昨日少年今白首歲將暮勸  
君酒

楊白花辭

楊白花初二月飛滿春江正愁絕有客沙頭來告別共  
挽長條落香雪

楊白花春冥冥飄颻無定止化作青浮萍悠悠亦是無  
根蒂可是無情動有情

城南行

城南陌上東西路戴勝飛來桑葉綠綠桑枝低挂羅裙  
佳人採桑春日曛陌頭騎馬年少客新着春衫面暫白

翠鞭時拍馬韉吟吟高調急驚春心女郎遙隔桑隴聽  
無由一笑開春襟低眉躑躅立多時回頭轉盼情亦深  
妾為盧郎婦君有秋胡金妾以節奉夫君以金奉母好  
置美酒壽高堂君搥鼓妾萬舞援箏莫彈陌上桑箏聲  
哀鳴兩心苦

棠梨墓歌

棠梨花白春似雪棠梨葉赤秋如血春來秋去棠梨枝  
長夜漫漫幾時徹明月照青鏡香霧綰翠髮草寒蟲嘖



噴花落鶯關關青燈耿玄閔黃土埋紅顏楊柳樓頭紅  
粉訶舞罷春風斂翠蛾莫厭樽前金巨羅君看岡頭宰  
堵波

為祥符縣滕碩先生題騶虞卷

陸渾之疆伊闕之旁氣盤勢阻水匯山蒼神獸見之當  
八月西律行天金氣洩向岵不怒亦不嘯貌閑言和心  
且狎但見黑章朕朕暎林薄白雪被身毛質潔更有兩  
虎作輿衛供奉飲包不敢闕賢王致之獻上京詞臣制

為影頌聲聖皇褒崇賜金勅王言致此由皇靈騶虞之  
身上天去至今形質留丹青承運殿上親賜與白璧不  
換千金輕騶虞千年為上瑞拜表又賀黃河清

五律

龍江別意二首

京華同作客執手未能分白雁天浮水青山樹入雲寫  
愁詩似盡惜別酒生紋薄暮空回首高城日正曛

送客都門道旗亭酒一罇雨餘芳草合風定落花繁曉

樹連雲暗春江帶雨渾明朝定相憶遙望一銷魂

和王清源教諭寒夜雜詠

筋力年來減窮愁客裏增夜風搖檠戟霜氣壓觚稜砌  
凍花粘甍窗虛紙照冰哦詩清不寐明發寄良朋

過黎城縣

曉過黎城縣川原似畫成雞棲連樹着牛鐸上山鳴小  
酌茅柴酒新嘗蕎麥羹周文猶用武聖代不煩兵

過沁水縣

米貴市無得賴司訓陳  
先生送酒米一飯而過

邑小居民衆途衝過客多田荒多間石路險半登坡市  
米如炊玉村醪似飲河廣文青眼顧相慰問如何

初冬

值此初冬候頑雲凍不消風威連夜動雪意挾寒驕官  
冷裝寒薄川回得信遙山中多故舊何用作書招

洛水春風寫竹作

行勝青竹杖溪上獨來時風定游絲墮天長去鳥遲閑  
雲流水意隨柳傍花詩無限幽人思尋常少得知

送陳主簿歸四明

祖帳近郊垞花明爛漫春十年三度嶺萬里一吟身東  
海老垂釣西亭醉問津謀身溫飽外詩酒見天真

賀三十生子

立年古有室生子未為遲湯餅皆佳客弄璋多好詩藍  
田生拱壁清水出摩尼從此喬家宅烟樓不可卑

禹功巖

琬琰何時寫磨崖紀聖功石紅經火烈字綠見苔封疏

決功能就懷襄害亦窮魚鰕民免化至德與天同

掛鼓石

奇峯名掛鼓今古竟相傳樹密清陰合烟消翠影圓  
端爛驚踞虎騫舉類飛鷲月夜聞鼉吼猶疑餘韻喧

題山居幽趣圖

幽人愛岑寂林下築幽居觸石雲生谷通泉溜決渠  
鶴眠春院靜猿去晚林疎時有採芝客商歌振碧虛

山居幽趣斷前詩句成

買得青山好林居事事清  
曉窓分竹色夜枕落泉聲  
露滴琴書潤雲隨几杖生  
未能脫簪笏鳥莫忘情

騶虞詩

騶虞神后出佳氣藹山隅  
瑞世千年出從風百獸趨  
質同金繡豸性異白於菟  
想見唐堯治窓前展畫圖

風木軒為吳審理賦

庭際瞻嘉樹蕭蕭日有聲  
霜風仍見慘歲月若為情有  
幸榮三釜無時捧一甕空階  
搖落處相對淚縱橫

過湖口縣

澄江東去急南槩入湖深林密藏秋雨山高倒夕陰麗  
譙臨小縣佛閣出遙岑當得風濤便無由得賞心

過九江府

早發潯陽岸秋風鴻鴈高谷容通窈窕江色變葡萄堅  
壁雄千雉危檣艤萬艘琵琶亭下水猶似響檀槽

五言排律

存心堂詩為彭州判作



虛靜元無迹靈臺本湛然服膺還有得逐物亦能遷  
準定知高下銅光見醜妍祇應求大用未是泥塵編北闕  
辭華衣南荒拜繡旃聽韶丹陛下納表五雲邊走馬來  
鍾阜持麾到潁川自今霄漢上爭看德星懸

金陵送別圖為體方黃先生作

聖代開文運西江盛偉人雅懷多蘊藉大器負經綸家  
世聯簪笏聲光動縉紳文雄才似水詩俊筆如神白雪  
難同調青雲好致身應時鳴鸞鷲當世得麒麟入作王

門客來為上國賓清操居侍博學待諮詢文府多裁  
製經筵費討論晚山別館盛春水片帆新祖席多才彥  
囊詩盡襲珍吹臺追逸客梁苑作詞臣契合應無間交  
游會有因夷山登覽快汗水往游頻行樂追攀屢論文  
懷抱伸相知惟管鮑交契得雷陳擬向高陽里相依為  
卜鄰

游上方寺和卞長史韻

尋幽來寶地聯轡盡佳朋隔水微聞磬窺林遠見燈未

談超世法先見小乘僧古殿生虛籟陰廊挂斷水幽軒  
聊借憩高塔險難登石鉢青蓮長天香翠靄凝風幡生  
夙悟雷鼓報晨興延坐分竒茗登臨挂瘦藤毒龍僧作  
伴香象佛能乘學道分真妄叅禪祖秀能悟空魔女去  
入定睡蛇騰境界清涼勝山林氣象增雅懷端可重塵  
抱不須矜暫結跏趺坐心源返照澄

送柳思之武陟令

柳氏河東秀何年去遠遐祗應尋玉斧得以住金華拱

壁來垂棘名駒產渥洼居鄉曾領薦治縣久栽花浪毀  
金為礦虛言玉有瑕看山吟好句見字識名家重睹中  
天日還乘貫月槎承恩辭紫禁霑命賜黃麻未署移山  
判先驅露冕車兒童騎竹馬父老候闈閣明日麗譙鼓  
鼙鼙報早衙

梁園寓稿卷三

欽定四庫全書

梁園寓稿卷四

明 王翰 撰

五絕

山居即事五首

羣狙戲絕巘一一聯臂下雨黑人蚤歸竊食巖下稼  
每愛羅家老殷勤久不窮秋風新粟熟先送滿筠籠  
清朝微雨歇雲氣行丹崖幾家挑菜女笑下青峯來

意閒禽鳥狎同出更同栖日高人尚眠就向窓前啼  
餉田分野飯社酒倒山樽茅舍無人守春風自閉門

憶山居

一別南山後于今已十年相應東嶺月空照草堂前

無題五首

惆悵昨宵夢千思與萬思黃河流入海豈有上天時  
心緒渾無定春空百尺絲夢隨蜀帝魄啼血向花枝  
愁來情緒惡錦瑟只閒拋一任朱絃絕何勞鳳嘴膠

猶記城南別歌殘折柳枝春深歸未得腸斷落花時  
坐見三春去無心作冶遊可憐明月夜獨自倚高樓

七絕

閒居書事

功名場上早抽身不蹋長安陌上塵明月清風無盡識  
天將真景付閒人

邨居感事三首

共待優人是貴人滿村簫鼓沸秋雲夜來鄉校追呼急

總道兒童不好文

早婚禮義已全乖  
偷薄成風更可哀  
幾欲持毫濡滄海  
不勝今日續新臺

親喪未葬不成哀  
笙笛悠悠笑語開  
月落燈昏梵唄歇  
就中扶出醉人來

題寒梅凍雀圖

冰肌翠袖淡無痕  
照影羅浮江上村  
霜鳥寒蜂解清意  
徘徊風月欲黃昏



題明皇吹簫圖二首

逆豎誰教解巧機  
玉簫新進上方吹  
進宮已自幾千里  
亡國何須數百枚

朝退從容適且安  
梁州新譜合清歡  
玉簫取次閑拈處  
便有霖鈴蜀道難

詠史五首

漢鼎恢圖入笑談  
豈期失利向東山  
召時已有忌才意

不待論封始犯顏

孔融

鋤菜忘金志亦雄眼高四海却如空當時不識公孫度  
必托中山大耳公

管寧

剛愎從來蹈禍機管生聰悟更知微若非太守能容物

亦嘆秋風鸚鵡飛

邴原

慢罵狂生捋虎鬚比言雀鼠意何如只緣要假劉郎手

魚道才名亦是虛

禰衡

一擲難如不顧人豫章一屈匪躬臣葛巾野服非君物

合着當年夷皓身

華歆

昭君怨

回首長門淚暗流  
羶城春似漢宮秋  
琵琶強勸單于酒  
酒正酣時妾正愁

讀汝南遺事三首

城南驚見宋人旗  
寄重承麟事已遲  
愧似二陵從北狩  
非干鞍馬倦驅馳

行院忠心匪石貞  
乘輿北幸志難伸  
誰知汝水深如海

能殺田橫五百人

仲德在徐邳時人無  
老少皆以行院呼之

火烈幽蘭國祚終絳山風節更高崇九泉若見諸藩鎮

羞殺恒山武相公

恒山  
王仙

南陌詞

南陌東邊楊柳枝長條拂水綠參差行人不似枝頭絮  
也有無風到地時

南陌東邊千樹花東家開罷落西家無心却愛西窓竹  
只向牆陰長笋芽

南陌東邊草染裙嫩青深翠一時新王孫去後無消息

春雨春烟惱殺人

墨桃華

武陵溪畔春風面  
研綠調朱染得真  
尤愛倪生能畫意  
只將淡墨寫精神

雪夜雜詩

閉門吟詠學飢鳶  
孤興高情自一天  
清景惟詩收拾得  
党家麤俗亦徒然

不燠被煖知風定  
未曉窓明覺雪深  
一夜小齋清不寐

詩成旋教小童唸

滿天星斗曉來收  
萬丈瑤臺夢裏遊  
物到歲寒偏耐看  
一軒松竹不勝幽

明河清淺護溪沙  
白鶴歸來處士家  
雪與寒梅有成約  
夜來才放兩三花

詩翁老去不禁寒  
日在柴門已返關  
清曉家僮呼我起  
牆頭驚失夜來山

雙瓜圖二首為瞿長史賦

開圖好似吳興筆愛與青斑為寫生中有周詩千古意  
子孫蕃大更才名

碧叢抽穗為茱萸青蔓懸瓜若旨茗一段天機精妙處  
便堪持此換瓊瑤

瞿長史黃瓜圖

車前楚楚初抽穗桂髓綿綿引嫩條葉底翠嬰真可摘  
孰云不可報瓊瑤

和王清源秋日漫興五首

苒苒沙汀展翠氈  
行行苔徑踏青錢  
適來倚杖看雲處  
閒與白鷗相對眠

閒扶藜杖立沙頭  
水落空江露遠洲  
紅日轉山將市散  
幾多漁艇漾寒流

信我行藏自有天  
任他歲月似奔川  
狂歌痛飲閒消遣  
不過人間一百年

菊花霜後半凋殘  
壁下蛩吟不奈寒  
多少朱門盡豪俊  
十年掉臂不相干



白鳥飛飛綠柳長  
雨收秋水滿橫塘  
敗荷折柄餘殘翠  
老藕著花留晚香

望嵩山

昔汝海揚飛輕登嵩陽樓詩曰清洛遠披宮女佩碧嵩高插羽人冠予過汝州見少

室宛然如一冠適有輕霞搖曳其上又如簪紒然予竒而作詩以記之

獵獵西風卷暮陰  
芙蓉古樣映遙岑  
物華呈瑞天然巧  
橫冠青霞作玉簪

和郵亭壁間趙氏韻

其夫嘗任朝官以事從軍詩語頗涉不平余故矯其意而

賡之

駟馬高車亦可誇  
輦瓢陋巷足生涯  
自從任運無心後  
楚越方知是一家

賺蘭亭圖

山陰樂事已塵埃  
留落名書到辨才  
殉葬昭陵何足貴  
他年佳傳更新裁

題白鷺圖

垂柳含風綠線長  
春鉏飛下玉雙雙  
一溪春水無人渡  
低掠蒹葭過石梁

白雲思親圖

暮山高處白雲生  
游子登臨淚滿纓  
恨不此身生羽翼  
隨雲飛去到親庭

題子陵釣臺圖

浪迹江湖隱姓名  
徵書何事下青冥  
狂奴一語如真有  
何用區區奏客星

題畫竹三首為黃伴讀作

雲望天風

翠壑風生萬竹啼  
清秋搖落怨淒淒  
踈叢顛仰渾無定  
鳴鳳來時不得棲

金風玉露

玉宇風生秋滿天  
露華涼冷浸芝田  
適來雲表臯禽下  
獨立蒼苔警不眠

淇水晴暉

淇水悠悠綠似苔  
衛侯文雅亦賢才  
可憐培養千年後  
盡塞宣房更可哀

孟浩然

詩愛襄陽老布衣  
玉堂字字總珠璣  
秋風歸興輸張翰  
不道槎頭鱖正肥

梁園寓稿卷四

欽定四庫全書

梁園寓稿卷五

明 王翰 撰

七律

奉教題龍江送別圖

曉日曛曛帳殿開  
五雲光彩上蓬萊  
鸞牋續卷題金薤  
鶴駕臨江送玉杯  
上國旌旗分將相  
從官詞賦總鄒枚  
蘭舟棹舉歛歌發  
回首青山繞鳳臺

夜月吹簫圖

梧桐月轉欲棲鴉  
閒弄參差隔紫霞  
彩鳳暗巢長樂樹  
金鶯偷語上陽花  
鬪粧涼露靄釵玉  
簇仗香雲繞扇紗  
吹到涼州移別調  
君王親為按紅牙

和卞長史郊行

夢裏尋春覺後遲  
分明曾到武陵西  
川光浴日驪珠動  
石氣蒸雲翠蓋齊  
一曲柳塘初下鴈  
數家茅屋不聞鷄  
世間萬事莊周蝶  
且共隨花信馬蹄



次韻峨眉山

霧作衣裳雲作屏玻璃萬頃着娉婷望夫石上偏多雨  
織女河邊欲墮星蟬螗夏涼收淺絳蟾蜍秋冷抹長青  
可憐天際微顰處六國興亡一夢醒

雪後簡伯純縣令

大地山河罄一前臘間三白見豐年天人巧剪銀河水  
山岳新開玉井蓮我欲忍寒還罷釣人誰乘興未歸船  
閉門不作袁安臥賴有夷山令尹賢

和黃體方郊行

長河水落露汀沙，隔水依稀似見花。  
曠野蒿萊千萬畝，荒村籬落兩三家。  
柳塘灑灑新堤固，麥隴青青小徑斜。  
自是遊人耽野趣，哦詩驢背不知賒。

題望雲思親圖

草鋪平野樹蒼蒼，遊子登臨倍感傷。  
鴻鴈去邊生客思，白雲飛處望親鄉。  
山遮故國身難越，水接遙天恨共長。  
何日得歸盱水上，一樽春酒壽高堂。

送吳指揮扈從汝寧

曾屬橐鞬侍玉墀分藩又從汝南馳幽蘭亭古連青瑣  
懸瓠城高駐綵旗射藝遠過猿臂巧畫名不減虎頭癡  
從容退食知多暇好為裁詩寄所思

破屋

大梁城內宋門前借得盧仝屋數椽一片危牆將倒地  
四周破瓦好窺天風穿每恨塵凝座雨漏長憂濕滿羶  
欲向浣花新卜築無人為送草堂錢

送馬文隆縣令歸臨潁

醉把離杯汴水頭  
大梁風物又新秋  
金門賜宴連朝醉  
華館題詩數日留  
斛麥每承賢宰送  
綈袍不待故人求  
乞書僮許歸桑梓  
投老瑤臺續舊游

丹山歸隱

洞天深入結茅茨  
陶令歸來鬢未絲  
篠蕩拂檐巢翡翠  
蒹葭近釣隱鷓鴣  
細炊白石能成飯  
淨掃蒼苔好看碁  
縱有徵書何處覓  
桃源去路少人知

慈竹軒

何物風標可悅神  
數竿脩竹雜蘭蓀  
開軒翠色連書幌  
隱几清陰落酒樽  
未覩朝陽鳴鷺鷥  
方欣春雨長兒孫  
羨君得此堪娛老  
况復高堂更樹萱

奉教題夷山晚望圖

朝朝鶴駕駐山頭  
極目天南是越州  
洱海川原何日到  
蜀江風浪幾回留  
鶴鷄每誦常聯榻  
花萼相輝共倚樓  
友愛天倫情最切  
別來幾許鬢成秋

古山道人詩卷

青山峩峩自太古中有物外真仙人一朝不隨舜花晝  
千載要見蟠桃春初平入山羊作隊丁令還家鶴語神  
自今好覓麻姑去看到滄海飛黃塵

臨池清興為張敬惟作二首

夷山山下有行窩池水經春綠似蘿佳客到門常載酒  
道人求字不籠鸞樹連別院鶯聲滑苔長閒庭鳥迹多  
自是心傳有家法莫忘三折始成波

梁園雜沓市塵紅中有幽人趣不同門掩綠苔行白鶴  
窓開蒼雪落青松晴泥汨汨蟠蚯蚓春水深深見活東  
好似高情陶靖節求工元不在絲桐

送陳惟一司訓還鄆陵伯振教授寫墨竹以送予

就題於上

曾上陳家聚德亭

亭在城外  
其址尚存

雲孫典教繼家聲許由祠

下花連塢彭祖崗邊水繞城纂史王門存藻鑑橫經庠  
序樂羣英廣文特寫寒梢碧為表平生一節貞

人日喜晴和體方伴讀韻

年年此日不常晴今日晴光品物生地底昆蟲將啓蟄  
世間草木盡回榮璿璣運轉天時正玉燭調和氣候平  
且喜新正風景好題詩不似劔南情

穀日喜晴和體方韻

穀旦占年喜得晴春來無物不回生日昇暘谷永初泮  
星轉蒼龍木向榮斗米三錢書歲稔遺蝗千尺見時平  
風流只有梁園客特寄新詩為寫情



送金伴讀歸汝寧省家

大梁門外分襟處南望白雲是蔡州且喜承恩延講席  
又蒙榮賜上歸舟幽軒月上吳城閉洄曲春生汝水流  
及到家庭元夕近滿街燈火照懽游

送郭工副煥章之汝寧放糧

羨公本是汾陽後致用還優經濟才千里黃塵承命去  
萬倉紅粟被恩開柳添新綠遮文旆梅送殘香入酒杯  
莫待梁園春事已公餘策馬早歸來

和黃體方伴讀新蟬韻

滿地殘花過雨天  
槐陰庭院響新蟬  
輕敲金奏當窓外  
閑撥銀箏向枕邊  
曉露吸殘青草岸  
晚風吹出綠楊烟  
家山深處林亭好  
曾被繁聲聒醉眠

和體方遊相國寺

夷山寶刹自唐家  
石塔橫空半欲斜  
神鹿聽經翻貝葉  
毒龍噴水出曇華  
呪師碧眼渾如鵠  
老衲弓身曲似蝦  
知我登堂來問法  
呼童先點趙州茶

題騶虞圖

陽翟山前洛水濱，騶虞瑞世自驚人。  
珠璣落紙矜能賦，金碧爭輝看寫真。  
猛氣折衝風漸瀝，素毛抖擻雪精神。  
適來拜賜端門下，他日披觀勝鳳麟。

琴月軒詩卷

幽人獨坐敞華亭，霽宇無塵河漢橫。  
窗紙漸明知月上，琴絲微冷覺秋生。  
霜凝碧樹烏三繞，露下蒼苔鶴一鳴。  
更得梅花相慰藉，聞香三弄不勝清。

題畫竹為胡子澄作

伶倫截得碧琅玕，裊裊新梢露未乾。  
便與鈞天裁鳳管，不將江浦製魚竿。  
蒼梧帝子蛾眉老，空谷佳人翠袖寒。  
只有幽軒隱君子，時時寫入畫圖看。

挽草堂李先生為李居恭

文江江上草堂寬，遊宦歸來鬢已皤。  
酒飲賢人秋社散，星亡處士夜臺寒。  
詩成自挽應難和，琴在無絃不用彈。  
自是承家有新錄，埋名千古便須刊。

奉教送汝陽王之國汝寧

宗藩百世鎮夷門  
列郡分封合禮文  
仙李盤根隨地盛  
銀潢瀉派自天分  
山川西去連秦晉  
風教南來及汝墳  
此去賢王思聖澤  
千年職貢效殷勤

客中清明

梁園三月遇清明  
旅况蕭條百感生  
故苑雨餘春草綠  
高城日上曉煙輕  
花間歌管懽娛動  
月下鞦韆笑語聲  
老去更無兒女念  
祇餘拜掃最關情

環翠堂二首為王審理

一曲清流上四圍世家種德有餘輝親藩開卷題金筵  
令子趨庭着繡衣風引晴嵐來几席鳥拖秋色入簷扉  
江山孕秀門庭貴夾路青槐四牡駢

華堂夙構玉為屏故相當年識地靈諸子鳳毛成令器  
雙親鶴髮見遐齡門前秋水千尋碧窗外寒山四面青  
珍重賢王揮彩筆流傳百代播芳馨

題瞿德臯奉親讀書處

日向華堂奉起居  
夜歸芸閣坐觀書  
養親願祝千齡壽  
稽古須通萬卷餘  
汗簡青青裁楚竹  
厨羹白白饌江魚  
它時會作龍頭客  
忠孝傳家定不虛

梁園言懷

秋入梁園木葉稀  
可憐歸計尚棲遲  
形骸不為裁詩瘦  
鬢髮還因覽鏡悲  
官路未通身已老  
文章雖好數先奇  
囊中清俸餘多少  
又被窮人五鬼知

寒潭漁隱

浪迹江湖作散人，碧潭霜冷見潛鱗。  
蘆華織被長眠雪，荷葉栽衣不浣塵。  
載酒幾迴尋賀老，畫圖何處訪玄真。  
自今已是成嘉遯，莫向桃源別問津。

慎獨齋

危坐窮經得趣深，敬存直欲禁邪淫。  
道求實用惟王業，學到真知見聖心。  
方寸不欺天地位，氣機纔動鬼神臨。  
先生猶恐多岐盛，用扁高齋要自箴。

送趙煉師歸白雲庵



白雲菴對白雲岑殿宇崢嶸雲氣深裊裊青猿啼竹裏  
雙雙赤鯉見潭心靈風颭爽神君至秋月空明木客吟  
羨子早年歸福地愧予何日遂投簪

暮秋梁園言懷呈體方伯振二詩伯

一夕青霜木葉殘地爐無火客衣單  
敢思澉滷葡萄酒釀孰厭闌干  
昔嘗盤交到忘形貧亦好拙知學步老尤難  
涓埃未報君恩重不欲歸田學挂冠

送時志秀才赴禮闈

梁園自古文辭盛，解后憐公有俊才。  
大器不為三語掾，雄文奪得一經魁。  
鳳凰臺上詩情好，龍虎榜頭春意回。  
想到京華方二月，須憑歸鴈寄音來。

和賜瞿長史象牙笏韻

周旋庭陛已多年，名器新頒秩九遷。  
價重一雙和氏璧，賜同十萬水衡錢。  
摛辭每措金坡下，對命高擎玉殿前。  
舊物青氈何足貴，好俱簪綬盛家傳。

奉教和王達善學士梅花四詠

梅影

黃昏相對自清神  
移上闌干似寫真  
窗外橫斜因得月  
水邊凌亂正愁人  
瘦宜苔徑偏留迹  
雅比花陰不染塵  
何必臨風香萬斛  
一枝搖弄自生春

梅香

雪為丰采月為神  
檀藥風傳始辨真  
高似廣寒攀桂客  
幽如湘水佩蘭人  
冰蕤吹破黃金粟  
玉骨薰穠紫麝塵  
世上羣芳孰可比  
可憐茉莉屬殘春

梅魂

祇疑姑射是花神，傲兀風霜可見真。  
庾嶺有情能駐馬，羅浮無夢更迷人。  
冰花借月方成魄，雪態生香自出塵。  
一段素靈招不得，誰家紙帳又添春。

梅格

皓彩名香總入神，世間俗眼久迷真。  
靚妝可比惟西子，艷態相看是北人。  
籬菊也貪彭澤酒，海棠終污馬嵬塵。  
古來知己林和靖，別作孤山一樣春。

世府賜新荔枝

門山歲歲獻時新，飛舸凌波不動塵。  
露顆摘來方盛夏，風花開處正芳春。  
濃含異味真堪貢，遠帶餘香足可珍。  
金殿翠盤方進罷，分嘗何幸到愚臣。

對月和卞長史韻

滄溟東望色浮金，轉上寒空秋已深。  
我欲登樓乘逸興，誰能對影有新吟。  
懸知此夕三更月，曾照前人萬古心。  
喚醒謫仙波底醉，一壺芳酒與同斟。

奉教和秋日四題

秋意

黃昏簾幕雨纖纖一段淒涼到枕邊  
冉冉光陰留不住  
悽悽情思苦難傳  
潘安有興因他遣  
宋玉多愁為此牽  
爭似無心隨化盡  
數杯閒臥釣魚船

秋信

寒來消息是誰傳  
金井梧桐一葉先  
殘暑已消團扇底  
新涼纔到短檠前  
問詳多在蛩聲裏  
寄遠常從鴈影邊

流浪浮生都不覺  
知機林外有鳴蟬

秋色

嵐光淡淡復濃濃  
多在園林夕照中  
綠減一川煙際草  
紅添千樹水邊楓  
落霞孤鶩吟難盡  
折葦殘荷畫不工  
只有謫仙情思苦  
灞陵傷別意無窮

秋聲

客窓欹枕夢難成  
風入空簷爽籟生  
穿過竹間金奏響  
飄來松頂翠濤驚  
一聲長笛吹霜急  
萬戶清砧擣月明

不識砌蛩綠底事向人也作不平鳴

陳如心家飲罷言懷


飲罷高齋借榻眠臥聽更漏意蕭然空牀夢斷雨方急  
短燭吟殘花倒懸舊館偶來還是客明公相見即如仙  
奔騰老驥渾無力擬向亨途借一鞭

驢死口號簡孫知縣

每向家山馳醉歸長鳴曾入浣花溪尋詩不畏途衝雪  
沽酒那憂路有泥貧裏市來渾似馬客中亡去棄如鷄



吳山不是多賢舊  
便欲徒歸塵土迷



梁園寓稿卷五